

四庫全書

集部

欽定四庫全書

集部

儼山集卷九十八至

一百

詳校官庶吉士臣李如筠

中書臣劉源溥覆勘

總校官庶吉士臣何思鈞

校對官助教臣卜惟吉

謄錄舉人臣蔣雲師

欽定四庫全書

儼山集卷九十八

明 陸深 撰

書

京中家書二十三首

周郁卿來嘗為致力置在高選知之知之昨有書附王  
世美家人行日下要遣一二人回具細報恐皆先此紙  
到也吾兒三場卷近稍稍出示館閣名公無不推賞已

令錄出細閱却有說理不透遣詞欠圓處秋涼得暇一批抹去要知時格泛濫殊不及前輩之精約也吾兒感傷之餘須留意保養雖是讀書作文功夫忌過苦杜元凱所謂優柔厭飫孟子勿忘勿助之間當熟玩味之交游一節尤宜慎擇前示雖出於人言要處要處汝早晚奉母多方寬諭慰解與汝姊共慇懃之作北來計此自有深意餘須忍事養心七月十六日

聞得造牌樓一事出自當道意思亦是相愛相厚知感

知感但吾平生不喜作此等華耀事况無相應地方若  
立在西街却犯白虎太盛且逼近約齋先生家無甚意  
思吾欲造在浦東祖宅却稱四柱可與三叔四叔等酌  
量必在街上益慶橋南有地步否崇姪回再作計較家  
中事體緩急宜作急報來七日

汝母病餘汝宜勸慰我心亦欲一回南部闕亦可得但  
朝廷聖明不敢言私近日品論廷臣各加優劣說如今  
翰林都無人只陸深舉動好將來可以入閣且遲些遲

些前在山陵亦說陸深只是慙直天語如此聞之感懼  
感懼汝不可多對人言未齋八月廿一日到任知之

昨廿九日得唐阿舅家人寄至書是五月廿五日發行  
是日溫託齋尚書改禮部代未齋詹事府到任赴公宴  
晚回始得黃標處人寄七月中書併知一甥亦歿此間  
廿六日庶女亦驚風而亡一時氣數如此無可奈何見  
汝母子書中皆無悲哀過傷之情吾心亦泰然為慰此  
等修短事在天地間自有一定之命吾人惟有修德以

應之古人云祈天永命是學問最難事吾兒勉之勉之  
可向汝姐夫婦說可戒暴怒積陰隲利心放寬些以為  
後嗣計至囑至囑崔縣丞昨來見亦多言汝力學向上  
勉之勉之朝廷恩典九月廿一日頒詔吾兒須來承受  
要收束行裝別報九月初二日

昨日小倪滕六寄書同到即復得張蕃喜音為之豁然  
計新生孫正及滿月想汝母子當具湯餅享客此亦人  
間第一等樂事也乳名吾為命之曰聞喜予聞而喜也

况是唐時進士宴名亦以此識之推命章文排筭甚宜  
養云是日主坐長生聞吾兒面生紅瘡此是心火過勞  
傷肺金所致於後嗣難育之象此等調攝自養當寬所  
謂寬者非弛縱頹靡之謂也凡事即從容順應要令無  
迫促急躁意思便是此盡性至命之事到此方是學問  
今日張文光亦到相見得書知汝行誼寡過足慰晚景  
但風俗日壞海濱尤甚吾兒宜力行古道可也九月七

日



明堂禮已成文武官表慶大宴於華蓋殿廿二日五更  
入朝得旨免賀遂領燕今早謝恩還禮部送到廷試錄  
即附莫主事回吾兒可分送尊長處初未能多陸續印  
還可遍致也適又聞族中可笑事吾兒不必過為疑慮  
亮青天可恃也陸棠二十日早下灣有備細書計與此  
先後到也新孫滿月想吉康獨此意懸懸耳廿五日早  
扈駕上陵還期不出月也百凡事宜包荒含忍是非言  
語不必計較俟便再書九月廿三日

廿四雞初鳴即撰進太祖高后樂章六成入東閣候至  
申時御殿下勅畢抵家已張燈矣連日夜身心寢食俱  
不得遂六七十老人恐難堪吾家族中復有幸災樂禍  
之心正所謂內迫外迫人生處此何樂耶唐鑿錫到相  
見未及細敘畧道吾兒行誼亦加贊歎世道如此正要  
吾人力挽回之齊家治國是一理只須順應切不可多  
疑過慮致生疾病不得為仁孝也慎之慎之作惡降殃  
天道不爽不願家門有此也奈何奈何冬至詔下恩典

吾兒作行計宜豫宜豫十月廿五日

吾兒論吾轉官事此自有定命斷非人謀可與也望人  
薦引防人擠排此等意念一毫不可留置胸中便成妬  
忌種子也吾一生官資十餘轉皆未嘗有所擇今官清  
燕可以省事可以養生亦可以寡過吾未厭也知之知  
之十月

處族之道當以孝弟為本而其尊敬當施之賢者至於  
任用必量其才力過則有悔而恩義於是不終矣吾家

諸姪中惟標模可託可教外族惟黃標可與議論此外非老耄所知也吾兒要須泛愛親仁始得

十六日有寄與陳岳糧長書十八夜宿翰林院之後堂奚學山家人書亦到知汝母康健并孫兒易長心甚慰悅中間所論遷轉事汝父一生不甚計較惟聽命而已別有詳悉報汝今早入朝頒詔仰賴天地祖宗三代俱蒙恩贈清卿學士叨冒逾分三十年來辛勤願望於此足矣但願吾兒立志勵行為好人以全門祚傳之于孫

吾更有何事耶恩廕想待東宮冊立吾兒可得也目下  
須積學俟時治家睦族以慰予南望之思欲令一二人  
回自作細報知之知之冬至晚燈下

吾兒不欲收買古董甚正當正當吾所以為之者欲為  
晚年消日之資亦不可為訓也若是古來禮樂之器又  
不可直以玩好視之今寄回鈞州缸一隻可盛吾家舊  
崑山石却須令胡匠做一圓架座朱紅漆前寄回銀硃  
兩包此出涪州俱是辰砂研成祇宜入漆不可雜用了

知之知之鈞州葵花水匳一副又有菱花水底一箇可  
配作兩付以為文房之飾餘不再收可也玻璃瓶彩漆  
架不佳可令蘇工製一烏木架可寶也

前有十六日附陳岳糧長書廿一日頒詔已有三代誥  
命感謝聖恩無德可報伺有吏部手本當差一人回議  
焚黃立祠堂禮春帖正門我欲題一方風教仁人里三  
世冰銜學士家於汝意如何如何吾每懼海濱土薄不  
勝重大只如此亦已為一時冠汝宜知此知此轉遷事

吾一生惟有義命不必過望惜福可也恩廕未有期汝  
須靜俟奉母讀書整頓家業開貢行學中淹滯得拔矣  
明日是汝母生日且在此祝延喜孫亦是一百二十日  
不勝南望感懷但不知學召行止如何王庫官行附此  
此人來宜禮待之聽言斟酌後附信

十六日早入太廟陪拜至午方出天氣清明聖容悅豫  
親見夏閣老手持黃票似是詔書條件俱出御製也知  
之知之此間事情盡出聖意如我轉遞皆朝廷自主張

無能為力但覺聖意眷注日加每有文字坐名撰次具  
稿進呈並無點竄即此恐無以報答榮進事靜以俟之  
此亦吾素行也吾兒不必健羨當權實難實難所論儲  
氏事甚當吾兒用為殷鑒可也府縣諸書只如禮酬答  
老年覺事多非敢有慢也族人鄉里善處之大抵為主  
者慈惠爾此古人所謂祈天永命者

初三日王侃庫官行附書四日遂遭章聖太后上仙舉  
哀成服至十三日扈從山陵北去十五日三更還館往



來半騎半轎天氣極寒擁重裘雖勞幸無恙也連日有  
顯陵遷合事宜議論未定廿四日申時奉御札與甬川  
同於次日上議旨未下聖駕南行已止恐流言訛傳致  
生驚惑吾兒須安靜待之無事無事奚學山黃門奉使  
行欲寄信忽張蕃朱貴等同到得書知汝母康強為之  
慰喜但世道下移吾兒以謙忍勤慎處之此心灑然矣  
陞遷事不必介介有命也十二月廿六日

汝所論交游事不必有促迫氣象海濱小邑風俗頽靡

之餘豈能便有豪傑之才可友吾兒且為衆所責望無得時名斷不可過高尊賢而容衆嘉善而矜不能此聖賢成法也更少以惠澤濟之至囑至囑所記章文懿公語非也乃劉忠宣公名大夏者是也

今早張文光來見我先謝他寫扁書字懸掛須擇名筆揚文貞公新居須請楊仲舉先生先行過以仲舉長者也汝輩宜體先賢此等意思吾意玉堂金馬非人間可扁不若只用學士第三字為穩實耳有一對聯託姚霽

寄回到未八日書行後附

昨山陵之行賞銀八兩近為四川採木工成賞銀二十兩紵絲二表裏此間日用須得家中每歲幫銀三百餘兩方穀去歲用帳算清發回查照此等事不必報知汝母可也汝母雖屢報好信來終是老年要調理加慎加慎知汝在家處族極難要寬著心胃隨機應之李序菴閣老十二月十六日故木不甚好可憐可歎四川寄回板不知如何再可破價收買數副擇得一具佳者寄來

此不必諱常事常事切事切事十二月

東宮冊立事准在新正吾當有廢子恩典吾兒前書欲  
留與慶龍此亦吾意但念孫尚小吾兒成名自有遺廢  
事例未晚也若舍子而廢孫恐於事體不便若命下吾  
兒勉承之且免升散之擾况及汝母未老時了此兼可  
入北監科舉也思之思之

舊歲廿六日有信附奚黃門是前後兩封却恐到遲今  
因黃標家人行寫寄今年京中甚寒適從早朝退後河

凍忽憶離家四年足月吾未嘗別汝母子如此之久也  
為之慨然奈何奈何吾今年六十三覺衰老不耐煩懷  
抱多不樂每自排遣夜間不得熟睡日中世安標甥時  
來伴話以為慰吾官至三品學士况遭逢恩典推及三  
世計年來家計亦自豐足此心無他厚望惟汝單弱在  
念事事鍾情汝既有志以聖賢事業自期不必與世俗  
較短長但處事貴脫灑切不可留滯傷氣橫逆之來孟  
子比之禽獸方寸要令海闊天空可也己亥元旦

近日選古文凡有數家惟此為得中附回熟讀之自可得文法也三祭文序事質實頗有好處故不批還大凡作文須要從胷次流出方成作家細看兩漢韓文當有自得處又須從與自己合處用工切不可隨人贊毀也上科三場卷向暖得暇亦細細批回

扈從之行兼掌行在印信殊不得已但賴天地祖宗餘庇及列聖在天之靈宗社綿長之福自可無虞遠方傳說想作一番喧攘只以鎮靜處之吾兒可加意安慰安

慰念吾家三十四年來享恩致榮顯富貴如此自合思  
報况我隨事斟酌汝宜安心合族弟姪子孫畧可以善  
言勸諭之追封三代得兼清銜廕子入監皆吾邑建設  
以來所未有不可不知感報十四日發京別差的當人  
回細報學召想已到家收拾家事停當以待二月十二  
昨十一日有書附黃標家人已行連日收束扈從買車  
而發即得宮僚之報已蒙聖恩改遷詹事府詹事兼翰  
林學士所謂宮端光學古今清美之秩甚懷慙懼此天

地降鑒祖宗積德所致不知所以為報也兼今日吏部題奏廕子本上一兩日得旨留陸龍領部文而還一日兩恩並美兼得雖吾兒亦思所以為報也可向母親前委曲開慰令其歡樂也三四兩弟便可出此告知明日五更入謝恩即上車就道矣二月十四

聖諭禮部掌行在印御筆親寫作翰林學士矣故宮僚之選得兼此銜介谿先生贈詩是實事實景寄回便可懸之中堂永作家傳之寶有和章二首并示吾兒亦可



和作或求邑中文人才子和之成一小集亦可謄黃可  
多抄分與各房藏之

儼山集卷九十八

欽定四庫全書

儼山集卷九十九

明 陸深 撰

書

京中家書二十四首

昨早日出時從駕入午門此行勞苦一生所無主上英  
明獨斷我與李蒲汀張陽峯三學士猶蒙聖眷僅降俸  
兩級三月間三婢產後病不起又聞家中火災日者云

我命最怕戊辰此月是已陸倅張蕃計三月望後當到不知汝治行如何又聞邑中火盜燒焚心意甚懸懸此是天運聽其自然人事惟有積德修善可禳或避地亦是一策但得汝子母同來京豈不為好汝母不欲來只是怕病耳可早晚勸之日下可打發的當人回別有細細處分汝宜三思之三思之四月十六燈前

恩廕一事諸公多勸遺之小孫石門甬川尤拳拳此皆知愛吾兒也吾意決與吾兒此則本分事於大體上亦

穩當後來顯榮吾兒自力致之兒且脫却升散送迎之  
勞閉門加工來北京鄉試一科此後事不可預必聽之  
天可也但須勉勵德業以圖補報耳

誥命三代軸文春暮可得驗封手本當先得之寄回以  
行焚黃之禮神主改題前書已報汝宜考檢禮制行之  
吾家兩處墳山文獻俱不足意有所待茲賴天地祖宗  
已得如願汝曾祖考妣木主竅中生卒年月開寫明白  
汝當以意撰一行狀來汝祖考妣誌石俱未埋可打兩

三幅汝據此亦作一狀不妨加詳未齋閣老行狀原稿  
并吾自撰行實與汝祖母賢母事蹟曾求蒲汀作傳者  
俱在綠漆竹絲食籬內舊置浦東樓上可仔細尋檢抄  
來欲求館閣諸老文字入碑中此事猝難就手可從容  
為之著忙則無頭緒也

家事吾一付之汝自料理雖不求贏積可也產業增置  
汝酌量之惟舊宅連傍祖塋間界可增價成之汝要禮  
部墨卷春暖時當為處置吾意近時舉業俱不如三五

十年以前有理致可看近作雖不經目亦可只看五魁  
卷有多少疵雜處餘可知矣昨問無競惟人文章却是  
甬川老先生所作知之新年不知提學先生出歲考否  
瞬息科場又到宜努力汝父母老矣家事只提大綱所  
讀書須於切要處用工此間有些書春間覓便寄回也  
世安叔說汝體氣弱胃膈有憤鬱之疾吾甚愁之學問  
要知性命此大頭腦處身外物可以理遣也

連得吾兒書皆與我論官級轉遷此是人間父子至情

但汝父自發身以來未嘗擇官而仕亦未嘗厚望於人  
至於清階榮任固聽其自至耳況近日陞擢皆受知主  
上親為注擬雖吏部亦不得與聞此又希世之遇顧衰  
鈍不能報稱爾知之知之雖然文名不如行名好官不  
如好人吾兒勉之勉之

吾方自詹事府公座還此是近日聖旨督責甚嚴殊為  
勞苦六月一日雷變奉先殿大小衙門修省賴此間人  
伴俱安但世安病復作方在調理令其家知之



龍江老先生家墓誌已為撰次知之若舉殯時在親戚中禮宜從厚可代我作一祭文以五糖卓三牲禮奠之吾家官資在前行禮不可簡薄此正義禮也黃良式求陳娘子墓誌潤筆不薄我以五兩折祭柩歸吾兒可從厚行禮大小家事嘗與良式計較各有成說可一一問之汝所論轉遷供職事是汝父子至情但利用安身吾一生所學其餘俟命而已若要趨利避害只管便安處著脚恐犯天律此等嘗與標細論矣

昨三林塘潘省祭棠回數字報去今姚霽還附去春帖  
一聯此出顧中書亨隸筆可懸之後廳雖涉誇詡亦實  
事也姚生此來可善待之近時風俗甚不好吾兒加意  
以處鄉曲慈惠可也

黃甥標喪偶兒女滿前殊可憐惜今決意作歸計矣乃  
叔黃潮一房絕後產業傾費當屬異姓吾兒可助其成  
若有借貸如所欲與之此子想不負也吾族內外親人  
如此之才識不多可扶持之此處要與謀些功名其命

如此奈何奈何顧世安病體甚費手其家有的當人可  
諭令遣一二人來我恐照料不及可上覆五媼處置或  
與世芳商量但不可張皇令人知也其餘家事悉付吾  
兒自處

寄回黃手本可珍藏傳家若行焚黃禮可照丈公家禮  
改題神主斟酌只請縣尹學諭等官須備表裏席面加  
厚便破費不宜儉惜若請府官鄉宦亦好但家下弟姪  
輩恐不得力吾兒一身照顧不到反失禮可量力為之

墳山上修理事不知兩弟如何吾兒可不惜財力以為  
光顯祖宗之報亦不必區區計較也若商量得焚黃禮  
可少待之儻乞得新銜尤為光顯併欲與瞿夫人請贈  
有例奏疏已寫須待回鑾之日此要酌處只題主禮重  
可與龍江姑夫議此以為緩急

昨晚龍壽到得書知汝母送女過蘇遂得學召蘇州書  
說頗喜悅康健雖然恐非老年病後所宜殊為懸念想  
冒暑還家矣無他恙否須謹事之今黃甥良式南還念

此子兩度來京皆是倚仗於我顧其命薄盡成狼狽驅  
馳最可憐惜其破費亦不少也茲回欲興復家產汝可  
量力助之我亦許矣此子不是負人者知之知之此間  
大小事體我悉與之酌量披露心腹視之如子汝可與  
謀議行事吾三族中後生聰明皆不如也但凡事多疑  
且好氣勝吾兒能以義理相與涵泳浸潤可為益友也  
知之知之慎之慎之兩日前有與顧慎顧浩等書計先

到閏月一日

部文到日汝可就起送行期須再報為准家事收拾想各有頭緒凡事只求穩實吾鄉時俗一毫不可效尤也此吾兒事吾不與矣車駕回京之日未期若汝母肯北來喜孫可出路覓舟寬大乘秋水至京骨肉團圓此家國太平盛時福也

顧未齋題本禁約假冒霍涓厓鄒東郭進東宮圖冊通報抄回可細看知時事如此主上聖明不敢以一毫文飾上瀆吾兒所論託病解官等事禍福身家尚可測耶

良式能具論可一一問之仔細仔細

自承天還京雖勞苦異常頗覺身體健浪脾胃勝前痰  
火比舊減半分明是土氣燥濕所為每與良式論此有  
日東歸不愁無娛老之資但愁無逸老之地若選擇得  
高明避濕去所在二三百里間作小齋高閣以為閉關  
面壁之計此是晚景前程也亦嘗託良式與姑蘇醫士  
周同一之謀之如何如何一之文雅有信誼若過家可  
以禮待之莫失莫失家事悉付汝吾祇一子豐約從汝

但見在家業必須處置有條理使後人可守此亦學問中第一事也連年有積蓄汝舉業之學秋冬間可溫習明春出門便是忙人知之喜孫可加意照料樓下削風最宜迴避至囑至囑閏七月四日

連日有朝參公事以奉先殿雷變修省聖意殊嚴覈也適王鎮撫襲職還來言松城下處彷彿記是茲溪所居今屬楊氏前後俱靠潮水宅後有一池塘云是唐堯賓教諭族中若王君來說可令曉事的當人相奪成之可



否不宜草草汝母子居海濱風俗日下兼近來火盜屢  
作不可不深長為慮縱吾他日得歸老江南欲就城郭  
居住知之知之

吾兒昨論正蒙頗見學問所得正要人毀譽此老  
高處在勇於求道其變化氣質知禮成性自是聖賢事  
業每與甬川論其偏處却是太和所謂道認氣為理爾  
故其書多與佛老相出入似不及周程淳粹吾兒且存  
此意於胸中涵濡之久別當有見

潘少參子仁行間附書知之沈鸞正月末書近日始到中間論吾官資遷轉正不須如此校量況名位有命禍福無端須順受之多少安樂豈可於是中置恩怨耶吾兒要當大着心胷始得吾老矣一生名位所至俱可不辱鄉里第愧不稱耳只待考得三品一滿便作歸計也宜體此意六月十八日

書來欲為吾集文稿舊曾清出三冊是丙子以前所作是姚天霽寫清放在浦東樓上西間壁廚內丁丑以後

文字俱散漫稿簿俱留在家可乘閒清出令人寫淨須  
我自刪定編次也墓誌向付姚時望可問子明訪之此  
事大難別作報

今早自閣下回適莫縣丞來辭云從陸還故附此此官  
淳實部解來京不曾十分管顧得可辨禮謝之只竹溪  
家解磚所託人不甚中因我扈駕南去却借了五六十  
兩官債孤兒寡婦殊可念也須與濟助之竹溪有些舊  
物毋令散逸可也近得徽州汪綺寄到四月間書只有

學召信知汝為他事所奪懸懸桂魁寫來朱氏房宅若要三百兩可忍虧成之不必計較也知之知之今年收拾家事處分停當正月間起程來就鄉試不為遲也再俟的信喜孫將週要保護至緊至緊七月一日

書畫是我一生精力所收俱各散漫不曾收拾不知汝有暇清理否我重入翰林屢有朝廷文字應酬苦無書檢閱此間有人事書亦復收買幾種今寫書目去來時可帶得緊要的數種若宋元板除此間所有盡可收束



當與謀之此兩便也吾邑傍浦邊海連年人心風俗日趨下流况火盜疊見不可無先事預防之術近嘗與公輔當軸者論此有築城之說不見吾鄉人有樂從趨事之意吾亦欲省事不敢勇為只好默贊耳縱使功成利不在吾一身一家而已此事良式知之詳悉若為吾身家計惟有遷居入府城為上策吾連次有書及此亦嘗託一二人謀之不知如何良式回可與謀此若移家入城後汝來京吾心可安有府縣可託靠耳須詳慎詳慎

七月廿九日偶理文字間喫點心折却當門左一齒言語頗覺漏風此是老信為之憮然累日汝母亦有此家事悉付之汝縱我歸休之日亦不理家事矣吾兒勉之勉之秋冬間收拾處置另書

吾自乙未春二月離家入關遂入蜀今屈指五年餘矣聞之故鄉風俗大不如前恨不能冲霄縮地一歸觀之又愧忠信素薄無益轉移此吾所以有移家卜居之計吾兒恐未盡知此心事也昨霍尚書渭厓先生來京一

相見便稱譽吾兒還田之事且云吾得之談先生兒要知之終譽甚難也姑弗論其他且如吾祖宗以來勤儉敬慎孝弟力田以起家積而發於吾身忝為仕族近見弟姪二三人皆不如意深慮吾家門祚衰矣吾兒勉當振起之其道以廉恥為要吾嘗愛歐陽公云有所不取之謂廉有所不為之謂恥吾兒謹識之己亥九月

三弟栢姪來京正當考察自陳之際恐懼修省多懷慙畏譏之慮凡事簡省不得加意加厚今賴朝廷祖宗廕



庇父子榮美而還冠裳名器燦然在躬惟願其好善修  
德以延詩禮之族相聚月餘苦詞累百想能感悟是吾  
老景手足之樂亦是老景家門之福也吾兒當致恭禮  
義以修子弟之職自餘細故小事皆不足較也昨九日  
得華亭附朱知縣乃弟書知母親康健甚慰甚慰喜孫  
頭瘡却是胎熱可求明醫治之明春北行便可作急收  
拾停當以俟九月十一日

儼山集卷九十九

欽定四庫全書

儼山集卷一百

明 陸深 撰

書

京中家書二十首

築城之說本出內閣吾無意必其間每見促我為之吾對曰老先生為我欲城一方居之我不若尋一城去住却其事如此此吾所以有遷居之計也近聞崑山有閣

老城之說毀譽之可畏者如此吾兒以鎮靜處之可也  
十月廿四日

天子親饗太廟行古禮皇后亞獻妃獻列聖命婦助祭  
用幃幙列班於廟廷一代禮文之盛惜汝母之不及與  
也吾為之南望慨然可從容達吾此意以感動之十一  
月三日

方在收束山陵之行黃驗封郎中親送改給追贈手本  
至朝廷曠蕩之恩祖宗豐厚之澤臣子希闊之遇友朋

憐愛之情一時併具所謂喜極涕零不知為子孫者何  
以為報也寄回便可據此焚黃改題神主且汛掃東廳  
權作祠堂禮節請龍江翁斟酌之

連日欲打發陸欽回有數事未定不曾起身昨日顧浩  
來陸劬繼至具知家中事心甚牽掛前書所謂世道正  
指骨肉間設謀欺害等事吾兒不可不長慮却顧也榛  
姪來告葬事已有定期但墳山營造吾平生精力盡費  
在此兼有勅命亭在誰敢輕為遷動祖穴只容五塚蓋

地氣已覺難勝七房穴本是我房侵過葬定豈容再讓  
榛辭甚直若已葬過如禮如法此於禮律無礙若未成  
葬可再令榛房人到京當請明於撫按與守令自有主  
張也只有吾兒北來決須奉母一來待科舉過後有處  
若宦途留滯難處難處此吾兒孝誠宜熟思熟思世安  
在此計議最熟標甥能詳之

三代誥命軸已送科掛號三月初間用寶制詞出於名  
筆吾甚愛其簡嚴厚重真王言也今日買得唐褚遂良

所臨蘭亭帖有米元章趙子昂諸名賢題跋乃希世之寶也吾家有月半眠食二帖皆足為傳家珍玩知之知之家中累歲收拾書畫皆吾精力所在有未經裝表者俱是陸欽經手可作一箱帶來兼收買得舊綾錦來為裝束過蘇却與周一之顧倩得一表背人來尤有用須湯氏乃可向曾與一之商量者黃良式亦知之此等事既可以娛老亦可以為清人事故及之發行若趨得四月中旬到庶老幼俱安至囑至囑

昨夜燈下周林陸俸到得汝書具知家下大小事務甚以為慰復以為念也老人旅懷奈何奈何聖駕南巡恐不能免俟有的信星馳歸報也吾意欲汝攜家來京此實為風俗薄惡乃出避地下策耳吾嘗細與黃標論量再三再四豈標忘之耶或不欲盡告汝也吾亦不欲盡告汝也汝姊意無他以為母親來此可以為樂可以養病兼風土比舊不同以此懇情耳無他無他汝意亦是孝情亦是孝情所謂異中之同也今因姚某回先附此



家中事付汝處分待報後為動靜可也十二月十七日  
棄遠田是吾兒好事今聞有紛紛作弊者顧恐吾兒受  
累耳所謂一法立一弊生要斟酌之糧額重輕吾舊牽  
兩鄉為中數今聞有司為均平之策不知料理得如何  
此是未齋之意今已當軸矣如丈量一事此公不甚知  
訣竅吾亦不曾細論也

人傳海盜大發時荒衆貧理勢必有但未知事變果如  
何吾邑人貪利而無遠謀此地又有典當大鋪誠大盜

之招也可慮可慮每在內閣二老便向予說築城之事  
吾每以溫言解之曰待吾遷入一城中住却未齋應聲  
道明春盡室入京矣此道理當然吾兒決作奉母北上  
之計可也新太守是黃華字秀卿號紫谷其人天下之  
選也與新大尹想有更新之政一郡之福也知之知之  
松城買一房遷居亦是喫緊處吾兒未可付之孟浪也  
日下別有的當人回報

前日陸劬回限在年內到家今打發陸欽回專為汝母

子攜家北來計連夜為此不能安寢每日與世安計較  
此事亦甚難處就中不如來為上策上策汝母病後與  
汝離別必至苦思自能增病若一路作遊山玩水之行  
老人必然舒暢此可盡汝孝誠我在此孤旅晚年夫婦  
得共團圓亦是至樂若費用稱家力可辦不消求人况  
我亦常有痰火發作病隨年長官中人事并門戶無人  
可託吾兒到此事有統一只四方回書酬禮不至受累  
况汝遂承國恩古人云為國忘家此乃大事忠臣孝子

當勉力為之自餘皆可處分古人所以鄙懷土懷居也  
只有新婦姪身朝廷南巡二事吾兒宜斟酌之得發行  
趣早為妙十二月七日

知均徭事出銀想有司立法之初如此不必告乞饒免  
且隨衆納銀自有公論也况我家三十年來蒙朝廷恩  
澤甚多所謂秋毫皆帝力也只奉府縣出銀亦是忠君  
報國一事吾兒知之知之昨曾與南原論定復附此  
得汝母書不欲北來亦是連次受累慮怕奈何奈何只

宜早晚寬慰不可勉強况恩典在冬至南郊方有文移  
往來起送却恐途中受暑熱新孫且不可遠行汝姊病  
後甚難甚難吾兒須打算與汝母離別得半年中可保  
無事只汝自來亦可也別有書

牌樓扁字求諸能書者寫成一時技藝只如此學士是  
五品例不及三代蒙恩得此亦是千載奇逢正可標揭  
以示後人遠勝於盡寫官名聚於一榜耳昨與黃甥標  
詳論之撫按諸公曾有作興者俱要查題府縣學官題

於左方

牌坊既蒙當道作興亦甚感悅榮美之事世所難得須承以謙所議題扁如吾兒意無不可者昨與黃標論此只有一官分樹二三坊者若以一坊并寫三官恐非制度吾意只題為學士坊兩旁雕花補之或題解元鼎魁以足鄉會試似為得禮如何如何

署書難得佳者前日寄來尺寸失寫官尺周尺雖令人寫却不知懸上大小入目如何須得人在樓下勾勒合

式方可傳遠無錫王惠可請來一寫更與唐承宗陳起  
靜商量描摸入刻方得定當此等文墨事正吾兒少年  
日力可工吾恐不能遠制也努力努力

此間時事早晚未定昨附奚學山今日未時詔下侍從  
還所回御札議亦下得旨知道了不至相左矣請乞三  
代誥命因吉日行關過吏部題本後即有手本先寄辨  
焚黃禮三十餘年辛勤得此兒輩當知所自也家事吾  
兒只照天理行去吾與弟輩安敢不加親愛亦欲教之

以延門祚一味姑息非祖宗望我之意此亦自有斟酌於其間也吾兒一意奉母向學開貢行汝頭上尚有幾人也便中報來

姚子明有母喪可為助銀米少致弔慰之意孫汝鳴拳拳之意吾甚感但老懶不曾致謝會間可致此意沈明卿海嘯歌甚佳邑中前輩少此作可為致意要當以古人自期待可也

適有星士推汝命今年科場甚利使我老父母早見兒



成名豈非晚福科場後汝母子欲歸何難也吾鄉近知  
荒歉盜賊難免一宜北來吾兒在家獨學未曾友天下  
士以充拓見識二宜北來近年北方地氣溫潤與往時  
不同且多明醫良藥汝母必喜三宜北來且早來謝恩  
恐負遲慢之罪兼吾老年有骨肉之樂此等吾兒又宜  
熟思之只小孫未宜出路娘子或未能料理門戶吾兒  
又宜熟思之不若作一併出路也且吾兒他日亦要事  
君獨身遠客亦要令家小習慣之不宜畏避也昨吏部

右堂推上有旨再推蓋為宮僚不可輕動故爾如張甬川兩疏給假送母皆不允司直任瀚乞養病為吏科所劾吾與兒別整六年人情世態種種變改要須早來庶面議以為善後之圖耳吾欲告汝者筆不能盡百凡動靜俱付之老天途中不宜惜小費不可干人交際之間當以道義為主至囑

昨日陸仁沈廷桂來得書知家中大小事體汝子母有北來計甚慰甚慰吾為此舉却是為汝母病後衰年消

遣優養以永日延年其次慮家中無得力仁義宗族可  
託汝子母難以相離雖吉凶禍福皆所不計豈念家事  
耶吾老來倚靠朝廷聖明所享所遇皆過分過望至於  
家產之厚薄用度之豐約此是吾兒事若其處分料理  
久已付之吾兒吾不與也吾兒不必過為避遜之詞惟  
是汝娘子娠孕一事殊為酬酢難處耳適與世安計較  
須是趁早入京或多置知事老媪一二人或在嘉興蘇  
州別顧一座船備用如何如何一則天熱二則科場近


不可遲疑也

崔東洲已陞太常寺卿掌國子監知之近日吏部之推不點者想聖意留為日講之地汝到此自知吾老年只求清燕耳聊示汝知兼向母親處說知夜來感寒作吐瀉殊無苦知之

此間只聞汝母子二月廿七日起身不見有端的消息懸懸之望日夜在心又聞道路饑荒寇盜復以為憂也但要謹慎小心歇泊處務須支更少睡最怕汝母驚動

凡百都付之老天至囑至囑聞河水此時想有又須計  
量炎熱熟思審處今差承差胡承宗同沈廷桂接來承  
宗是山西舊人頗實落故用可善待之途中行止事宜  
悉已分付汝再當駕馭之沈廷桂愚狠不中當事只我  
家人無一人可託者奈何奈何見面時細商量也吾身  
比往年覺得病少近日講經筵無講衍義上命至榮後  
來恩典亦重平生願望而不可得者賴天地祖宗無以  
為報所惜到手遲覺費力也汝母須左右順適要令忘

憂至囑至囑



儼山集卷一百